

臨齋集

卷三

書


5563.8

2024

v.3

卷七

BERKELEY
LIBRARY
UNIVERSITY OF
CALIFORNIA



臨齋先生文集卷之五

書

與吳景伯

祥春。庚戌十二月晦日

吾兄世業不專在工文詞取科榜自先世有文有行
江左所服兄果自處以科目世家期以科名繼先乎
若爾則非善繼善述者矣環顧一世守以士子之道
者其誰奔奔逐逐自損其志自敗其身徒以假借緣
歸釣名媒譽爲事是曷故焉是其非得失之心太過
者乎噫生此王國者雖自期以聖賢事業亦未嘗不
業於科但當無傷吾志任天做去得之則幸雖不得

無損於我古人所謂亦不失於令名者此也有一種
可恠之說貧不能爲學是未滿一笑學果是別件底
事乎凡志學者惟在立志之篤貧富奚關於其間哉
顏淵樂於簞瓢原憲不厭糟糠隨所遇而安規彼不
義之富貴如浮雲今之云貧不能學聖賢之道者豈
非退托之辭而其志趣之淺陋果何如耶吾志旣立
天下安有不做底事陽氣發處金石可透豈不信哉
今之習於記誦詞章者往往有等異之才出乎其間
而終於自棄身沒無聞夫孰知斯人之生於何代百
年之間也如使移其才而養之於真正門路必做第

一等無上極好底人可惜可惜贊奎依歸有所志已
矣從茲以往當隨分自好圖保性命於溝壑豈非
如吾鹵莽之大幸而惟夙宵憧憧於宵抱者待吾兄
自悟與之同歸耳澄心垂照焉

答具景伯

辛亥正月十二日

頃辱疏承哀候履新支重萬萬慰慰而縱橫盈幅存
撫肫摯辦香一讀不覺滯吝消散也然獎詡多有過
當豈但吾分之不堪在兄亦不免爲一言不知無乃
眷勉之期與之必欲達於古賢之爲耶愧汗之餘亦
不敢不勉也在昔吾輩之放狂也上下角逐豪縱不

羈詩酒琴歌追遇江湖則傾醉吐膽之席尚論天下
古今人物文章不出於唐宋之八家不復知有聖賢
道術之可貴而及於一言半辭是何徒浮靡貿貿之
一至此哉究其由寔王柳歐蘇輩首其罪也烏足以
轍其迹也承示行已不賤陋設心不傷害云者是固
善矣爲聖爲賢亶不外此然已不賤陋則身修心不
傷害則心正心正身修果無素所用工而遽容易於
一朝者乎其工也必須於格致誠正之工此工不立
則其殆無源之流不絕者鮮矣無根之木不仆者寡
矣况欲勅躬操心試喫得大學中肉菜也味於心而

胖於體則自不知手之舞之足之蹈之也贊奎去歲
秋受讀一部大學於師門尚今未了叔效無期惟口
譚聖賢而身猶流俗者也昔尹和靖見伊川半年方
得大學西銘看信乎信乎徐幹治學說曰倦立而遠
息不如速行而必至孤居而願智不如務學而必達
程伯子曰所見所期不可不遠且大叔子曰有求爲
聖人之志然後可與爲學古諺曰但存方寸地留與
子孫耕凡此諸說皆足以警策頽惰誦味之餘并告
及之

與具景伯癸酉六月

羈旅之苦浮生所歎者功名是何物從古能困苦人如此尤有所難者俯仰於人軟熟於已皆涉世之艱者也所以近世士子無復古士風其遊於公卿大夫之間者往往無見重豈待之者輕易人哉惟見待者不自重耳蓋外求之念爲病根不少天下其有求人而不媚人者乎媚人者自少正直之氣媚於人者暗滋驕亢之態此士與大夫之兩失其規而駸駸風氣不古者也此兄所平日雅言雅尚而一朝遊京師其有一半分合於時者乎窮達命也早晚時也非人力可容於其間吾於兄今日之遊卜其命與時耳

答具景伯 癸酉陽月二十七日

昔蘇季子游說諸侯困而歸妻不下機嫂不爲炊其
困亦甚矣兄之歸也其無是安可保也然而入門抱
新孫其所得亦已多矣今之翱翔於金馬玉堂之上
紆綬仗鉞於藩閫之間者思欲抱一孫而不可得者
凡幾人三公不換卽此在矣幸兄不謂無所得而歸
也生前極富貴不如身後好子孫此亦古人名論在
矣吾以是爲賀不已竹裏寒齋無誰與晤兄若惠然
則五夜地燈細談無窮我懷愁騷非兄莫攄兄懷
抱非我莫開相對娓娓達曙不寐在青年時猶然矧

白首殘年之日乎噫白首殘年字今無難下語矣

答朴性綱冕東○己丑十一月十日

顧一世儕輩不死則皆老而病老病而又不能源源相見則烏得以見在身自居耶祇自悵悵兄八萬山溪處以耕讀漁樵自樂此經綸一身家也世外甚事何須問也此贊奎所健羨而不得者也

答李穡王

錫奎○庚寅三月二十八日

一書贊奎不能先之於兄今爲兄所先感愧且悚然有由焉以我六十六年猶以老醜見棄於世無復以生人待之欲磨滅此老一字而朝朝鏡面去益可憎

所以事事學少年愛與少年好從與少年遊于斯之
際豈復暇念於八耄翁耶劇呵劇呵江山魚鳥好取
管領几案圖書隨意繙閱如年之日卧起以送受不
問戶外有甚事此兄之厚修前身享此無量大福於
今生平地神仙顧不在茲乎而猶向汨没人發艷艷
語無乃反其辭爲哂笑耶

與趙德懋命和 己酉七月

夏工其間所得想過人一頭地然不以爲多到底呆
篤耶以兄之才先立真正門路而所謂時文借隙倣
去亦足爲科場上壓倒不此之爲反彼之役汲汲焉

者無乃非不可耶先賢文集隨存惠借是亦友輔之
一道

與孫敬寬

廷高◇戊戌二月十日

相距莽蒼可望而不可親視古人南阡北陌晨夕相
隨風義之不及如是耶贊矣春來連以瘡病淹第
閣符若將不日到前此豈久長之物耶如是以生生
亦何樂庶或不歸第誼春和一相握於川柳山花之
間

答申希道

海鎮◇乙未八月

搬移之計猝難如意姑且看過耶亦自無妨而然非

永奠適軸之地諒之如何吾輩友離不死觀居此世者果何事而但家貧世險諸孫皆沒覺若假我以幾年庶可見其定頓惟是之爲望是亦此世間說一朝溘然復誰知者何必屑屑以此爲念耶邇來消息日新月盛多創見剖判以來所未見聞底事事雖欲掩耳闔眼不可得也一奉未易其期擬欲以秋晚未寒時一進攄懷而亦何能爲計也

答郭仲貫

致道◇辛卯十二月二十八日

從侄回先聞新人極嘉喜甚若病情頓蘇莫知其孫之癡而猶喜其齊之賢於其孫是何見惑也然語及

此孫處稱與浮實其於安老者心非不爲雅量之得而還恐出於未副望願之甚人之作不作多在初出入聞見是則不能無望於老兄

答沈士行

識之◇已亥四月二日

尊先碣文顧托非其人而教意旣勤有難孤負茲撰呈還切悚愧贊奎癘醜日甚去死只隔秋毫一識之願何以得遂釋云有閩府其言信早晚相會不以面而以名則可相記良呵

與蔡致賢

廷植◇丁亥二月晦日

回顧少年遊從今幾人在知舊之思老去彌篤而猶

不得源源者筋力所難強也不有次面者乎然書亦
病懶末之也噫老焉用爲哉贊奎課子課孫猶患不
任而驅而置諸生之上無一毫及人之效諸生亦不
過諷詠一誦只爲應文之具此豈國家設學院之本
意也宜早自退歸苦不出代尚此拘縻悶斯悶斯

答崔善汝慶發○辛酉

沙溪答人問曰前喪大祥之祭服其喪服入哭後服
大祥服祭畢還服後喪服可也此可遵行且前喪禫
祭不可行於後喪中亦不忍於凶時行吉之意

答都致範

鎮洪○丁亥四月七日

令咸向有愆節已完弱冠妙齡不好從老人遊是亦俗下常情而不知此友如何而好我不已我如何而愛莫之弛也渙薄世界此亦不易得事顧所愧素乏及人力無以鼓振其大心量

答朴而善

敦永○已亥

俯示公山遊序辭理俱臻而至若人數倍徒謂不讓古則未也人苦數多此不及古人處也尾及龍蛇倡義事而曰若使古賢當今日太平安知昔日甲冑不爲今日卸屐乎且使吾輩當昔日板蕩寧知今日卸屐不爲昔日甲冑壯哉言乎足聳志士之氣也

與韓循汝

道裕

○壬子十一月九日

貴辛清迥環以萬嶂塵事不到洵學古之士玩心求
志之所也咿唔鑽研其樂果何如顧今學術不振舉
以功令詞章之習羣羣昏醉成一迷局世間幾多英
材盡爲此中所誤此白拔脫甚不易而高明能辦得
甚盛甚盛嘗聞先師贈高明詩憐爾高如三代士停
身不赴棘圍場又云珍重百年吾道托臨門執手勉
子歸始以能事將與之終以鄭重之教加勗焉未知
何慘能仰答先師之至教也

答朴元吉

亨求○戊辰五月廿八日

情訊歷數千里閱四箇朔辛勤抵到德儀如接緒論
更承念昔江上追隨今爲十八年事滄桑幻化文藻
俱空而以我當日後進年少今髣髴已星星長於我
如執事尚何說哉亦君子道腴不與血氣俱衰聞北
方風氣漸朗文學日新皆吾同門先覺之有以啓發
之耳幸彌自勉勵導率一方先師遺集已印行矣讀
先師之書則於先師之道門路庶不迷而恨不能廣
布以嘉惠也韓立軒墓草已累宿而東都處士之廬
無人悵悼鄙鄉與彼天涯角矣而直北便帆往來不
絕幸無惜金玉

答洪文杓

理禹。丁卯四月六日

五年前一書遠來二千餘里苟非風義之篤能如是乎占復此稽潑愧同門諸益之散居各處者能講道專篤讀先生之書而得其心則先生之道可得以傳矣關以北人文大闢敦詩禮力孝悌彬彬有鄒魯風魯變至道亦所不難同志之士相與勉旃示托文字其始之不卽副終焉此遷延者俱以人不足爲重言不足爲文也而今茲卒不能辭焉者以勤申之托竟不可虛孤也哂扯之時因南來鴈寄以好音

答姜文一

進奎。辛酉七月二十日

承惠書卽二千里信息而十年前顏範欣倒曷勝近日風氣渝澁無復有真心嚮道而北方多文學之士興乎其間一脉緒餘賴而不墜是亦循環之理也鄭雅北學數十載其進無量磨礱輔資之益是可見矣

答金體一

萬壽。辛酉七月二十日

昔在鷺江日追隨之樂豈可再得乎滄桑幻化影隔前塵而今則江山換主蘆漪精舍無處可尋回念及此我心西悲承示喻尤不勝快悵鄭雅一朝合而黎然有似舊之歡但逢別凌遽莫之叙蘊

與李聲振

玄樛。庚寅

世間吉凶禍福固非前定而其或有莫之致而至者
又或不免有自速者靜則吉多凶少動則凶多吉少
勢所然矣從茲以往關了門閉了戶把截四路頭惟
多讀古人書俯讀仰思真知實踐以究古士君子所
以禔躬憂世之方蘊之爲經綸施之爲事功莫謂人
莫我知也

答李聲遠

錄謨○壬辰五月十六日

明德說先賢皆以主心言而農巖之明德本指心而
性情在其中云者完備的確近世以明德爲主理者
專是求多於人而欲突過前人也除却多少說只白

直看章句釋明德二十四字中下一以字自有精義
可見主心之義不曰心而曰明德者從光明德義上
表章也心是虛靈不昧故曰明具理應事故曰德

答朴元淑

洪默○甲午五月十六日

俯詢學庸疑義雖空疎無可對之實因此講確亦或
相長大學是說學所以言正心事中庸是明理所以
言天命性然性只是心之理故中庸之理放之則彌
六合者心之用也卷之則退藏於密者心之體也故
以中庸爲傳授心法也且夫大學之言峻德明命敬
止罔非性理上說下來故曰庸學相爲表裏而朱子

於序文各舉心性字以互相發明也若曰學不言性有以待子思庸不言心待孟子則未信其必然朱子於論孟無一言以弁之者其或以所記非一言所言非一事無綱領之可揔會則不必強爲之序而弁之以序說耶

答朴性容

元默○壬寅十二月七日

示喻擬非以倫推許失當竊恐硿石不免爲一言不知也今胤性度穩重真有受之器而依歸得所跟著已固所以延譽於朋知之間亦已久矣自期與入待之旣不輕而重則胤南擔簦者其有息肩之暇乎幸勿

循俗低昂一嚮以襍實頭負荷得來如何每恨者天下英才何限而卓立家計者或未見森然如立序耳

與李愿淳 秉裕 ◇ 己酉

向也不我面別想科事情憤怍所由致只恨不能移此憤怍於學也今承示諭失隅餘羞只向尋數上贖得云者旋喜其奮拔勇前大有所爲爲之賀不已也賢者所居果何地也文元先生遺此一區於後孫者所期望豈止生斯長斯已矣乎紹述志業垂令名於無窮是其裕昆之本意也賢者無徒過口之悔潑存著心之工述先啓後卽於是乎在矣豈徒庇蔭先休汲

汲於外至之榮爲可哉

答安聖化教錄 ◇ 癸卯正月二十六日

不自致而至者所謂橫來祇當不較已耳然世變日甚可歎不飢之罪若是甚乎過境旣已而將頭事無地非十丈坎坑無時非一場風色善處之道苦無其
籌奈何

答鄭

閻教 ◇ 癸未二月二十一日

科規已自昨年行貢舉法以孝廉學術才諳三目抄薦赴會試對策此慶科別試爲然式科則未知何如爲例也大抵科弊極矣極則變古人有言曰國家以

科舉取人使君子不得已爲小人若以德行取人使
小人不得已爲君子誠哉言乎今則彬彬多士盡從
孝廉學術中做將來其庶幾矣乎

與申進士泰輿
○丙辰十一月一日

千嶂競秀萬木蕭森心境俱清正好看翫然對呷
了得幾篇古人以讀壁經化於嚼乾栗愈嚼而愈有
味也可能於無味中有味乃能知餘味之味如晦翁
攸訓否苦心勞力體究翫蹟事君臨民其在斯矣近
來士大夫鮮好讀書惟進取是急不知將何所藉手
而發揮事功也竊覲高明天分慙高志尚超俗捨紛

華之場而處寂寞之濱垂聲徹清晨之鐘矻矻不自
休青雲自是分內事而白雲之緣祗是今日今日豈
多得者耶既不多得則曷不惜分陰於三餘也

與徐

相字○癸巳至月二十七日

驢跡還尋擬在何日雪崩嵯峨將何得抵耶厨烟屢
空冰突不煬古人所不免其將心丹伏火坐卧嚙雪
出金石聲歟近日賦雪咏梅所得爲幾篇滿腹瓊琚
無一字之救飢執事終非久困俗下者益留意於異
日需用之具

答洪承旨

時模○丙申十一月

先師禮說湖本祇就印集中輯成者非全稿所選出也愚曾有全稿中禮說類選故其時往復湖中要以合成全書書未達而湖本已活印矣可勝恨哉于後告議於先師嗣孫鄮中所藏將繕寫爲嶺本以竣後日而刊行無其力矣嶺本若謄出二本則一本將擬藏於本宅而此亦未易就緒

答趙承旨

忠熙○丙子十二月十一日

昔日三濟上讀書佳秀才贈我藍田硯了了如昨日事而今見翱翔於雲衢之上贈我以內賜記注筆耶供職之暇以書史自娛提躬善身在是紹述家學

在是致君澤民亦在是幸益慥慥彌勉進修

與洪注書

大厚○戊子十一月二日

高明今日畱居之地卽先師昔日巾屨之所一動靜一語默靡或自忽而聞日課孟子書此好消息先生年譜第七板有載錄事可奉翫而知也至若登臨山水揆選烟霞先師痼癖攸存裨精之所暢叙氣象之所灑落亦不宜局苑於堵室之間

慰洪

顯庠別紙 癸卯

禮書之外痛哭何言哀年未壯將何以扶持門戶倍萬自愛紹述家聲襄禮定于何地襄期定在何時先

師遺集本稿數帙同封畱置於文義前日由吏家而
未及移藏於本宅此卽速爲之之事送信實入其他
書冊盡數移來如何又有書冊畱置於永同親舊家
而未還者耳竄藏書冊一不借人一借則失之耳涕
漬紙不能煩提

答韓仲卿

錫瓚○辛巳九月十七日

長子斬服中平居與出入服色先師嘗與蘇監役純
汝書有云笠用麤黑漆笠柁用生布道柁帶用麻絞
居恆服布中衣網巾用布飾邊已矣愚亦遵而行之

答李鳳直

圭鳳○壬寅十二月十日

示中姓名職卹書否曾見師門多述金石文字而未
見名上自書官爵未聞受文家不書官爵則是儒門
通行之規贊平生頭不巾身不裕襪爲其不以見
職自居也洪承宣去七月日奄逝本宅尚在黃橋而
其幼孫年纔十三病斃中僅成娶云本宅情境有難
形言痛哭痛哭

答韓

麟源○己丑六月十二日

賢苦勞餓之不能專心於此事雖若可恨然日用事
事當理做將去卽此是學何必擎跪曲拳兀然守雌
而已乎賢自有家學淵源固守無失則廢乎不遠矣

答田

相洛

不出先亭一步地此尤好消息山上有薇蕨否強名
曰首陽則生事寥落何須爲悶餓死固亦難矣先集
之爲童行所失聞甚驚歎嘉惠後來之名言至論將
於何考信幸叔零餘以爲不朽之圖禮說十條就考
已爲他人所占爲重疊而又詳畧不同無以去彼取
此此將奈何晨謁時祭兩條擬欲無闕而姑未知如
何爲計也經禮弁輯之盛見甚合淺慮之曾所筭而
但昏耄比甚無人相資未知其卒就所願否也見今
湖本爲四冊而顧本則爲八冊若合經說又將幾冊

其不爲十許冊乎將何以爲役

答鄭舜協

華述。己亥三月七日

貪病二字吾輩苦魔古人云氣節文章是學者二魔爲其不用心於內而徒以意氣有爲也此則在自家爲也至若貪病非由自致而爲學者二魔者久矣古今通患安之若命已耳

答申衡玉

漢斗。丁酉四月四日

離亂之餘祖孫相對其喜可知目今爲家之道耕讀外更無他事見孫兒儀表如此幸加教督無少放過渠輩所爲直不過書冊上而任他因循則今年明年

終做得甚事子孫成就專在父兄教導既外無師友
之賢則更無望於資益惟在自己篤實而已在父兄
地易於呵責之嚴而徒嚴徒責傷恩而已豈若諭之
勸之獎之引之又從以誠勤之如何吾誠所到必有
效應雙孫告歸前拜心懷更覺悵鼓多少渠輩口陳

答崔濟敬

灤○己亥

吾所濃慟非專以壻之爲耳所相期於遠大者多矣
豈意泡沫風燈若是其奄忽也況以上慈情境想無
以喻豈以無益之悲徒損不貲之身古來賢達亦所
不免則視以爲譬以無可奈何處之此骨髓之病無

藥可醫惟日久爲藥傷虎之懼曾所經歷而知無或
濫觴徒自傷身姑殯淺土求窆擇其向陽土厚處夫
婦^能窆^弟竢諸孺多生以繼其后無至白楊古墓

答郭道彥

守常○壬辰八月廿日

貴庄年事稍登鄉居所願其有過此者乎農牛亦不
免許多見敗此亦一同灾沴前頭事廢耕而後已其
將有出牛之穴耶可歎新行不須緩晚親迎後三月
而婦見今幾箇三月矣鹿車之行不得不早趨以陽
月旬三證示之期如何見今家舍未定厩居姑寓數
間蝸室促膝迫額是則可悶而蓬簞之居是吾輩常

早使新人當之熟知艱窘之爲可安而不可忘亦不
害爲惜福之道此意說與預知所以偃僂出入甚呵

答李聖弼

熙憲○庚子十二月廿八日

孫女所苦尚未差完可悶已于歸矣未一朔歸寧非
可議到而今不可以拘滯常規托以治療亟以開初
治送如此則勢將胤即相依尊門門戶之望專繫此
即一向放過亦非養正之道雖在此有何別樣教誘
然自當有漸磨浸漬回心悟覺之日一有此事前程
進步自有餘裕且此時非舊日光景去益尤甚氈針
體粟無有已日亦早圖其善處之方切勿因循苟且

答崔和集

鳳寶。乙未四月十一日

今胤遠來相訪書出其袖不面而書古道也甚感甚
感易教之託託非其人癯醜之極百爲禪空有何纖
毫及人之力耶媿無以副勤意也雖不有益於人必
有益於我是其相長之術不無於相求之地

答白

鑾洙問目已亥

禮無痘疫廢祭之文而爲禁忌廢祭則歸重於痘疫
因不潔而停祭則歸重於祀事耶俗忌豈君子之所
爲哉當祭則祭不爲其所棄此有梅山先師說可證
然祭取蠲潔而痘疫欠潔具祭需於異宮子孫之所

臣家多子
行祭於外軒恐宜

答蔡鳴國

熈鳳○丁亥三月十六日

以懶根恆痼曾茅漸塞日事浪遊虛送光陰爲憂淡
知已病憂其所當憂如高明者能復幾人善乎往哲
之言曰人生天地間苟得聞其道生也不虛生死也
不虛死人生天地間苟不聞其道生也枉了生死也
枉了死其言痛切能令世間有志男子一場痛哭也
鳴國乎其勉之

答曹

有贊○辛卯至月廿八日

正鵠設而射志定土範齊而鑄器良學問之所取資

於師友之益有如是矣然既得其益篤而守之專在於已難仰他人如舟上灘只管努力撐篙如兵鏖戰但聞耳邊鼓響千萬勉旃卒就遠大世之人不患無其志舉多一時意氣鮮克厥終者也高明豈爲是耶

答柳

遠重◇辛卯六月十二日

示諭功令之弊說得真切令人欽服不知者不足道也既知其爲弊則此窠臼何不一躍躍出而猶久困於此耶以賢之雅操貞確早已辨於內外輕重之別非可慮於外慕攸棄而但溺人昏海安保無倒水羅漢也亟圖回棹

答曹景行

秉夏

見課患傳費却幾時月讀得幾百周而見聖賢述作
傳授之意自有條理如繩貫碁局之不可亂難是易
之漸疑是覺之機刻苦其心喫緊其工夫有渙然者
矣是書也劈初頭一天字中間包括萬事終歸宿一
天字以示一貫之妙蓋非聖孫筆力不能如是之擺
布細密矣昔臺山金公誦道也者不可須臾離可離
非道也之句舉手圈空貫珠曰文章亦好當時士大
夫嗜書之癖如此而其見識道理皆由此出國家安
得不泰平乎今人見草莽中讀書者目之以餓死鬼

而冷笑之將不知至何樣世界可歎

答沈漢朝

宗澤辛丑七月晦

嘗聞之學問祇是務內而不務外爲己而不爲人也
有過口之悔無著肚之實終於無所成幸須立著腳
跟闊著心曾細著工夫卒就遠大之業

答沈敬夫

宜燾問目壬寅三月廿八日

首章述所傳之義以立言而其下多引孔子之言以
明之於此可見子思所述之旨歟

性道教皆兼人物看

常存敬畏是未發時工夫則畏者不可太重看如上

蔡惺惺是也祇是畧畧存畏之謂也不可以已發着
言戒慎於不睹言恐懼於不聞者恐非別有義也亦
可互換說也欲穿鑿則豈無其說耶

庸學之規不見聽不聞加一之字者以表其有心無
心之異其說似是

與崔文叟

璋◇丁亥三月十七日

葩經讀來讀去千周萬遍詩可以立立志必於是思
無邪一句語簡要切當蔽三百篇愚亦曰古今天下
萬事可以此一言而蔽之於此焉得力邇之事父遠
之事君何所處而不當敬相對如賓造端於君子之

道否此一事不能爲他事寧可望耶

答裴學三

在煥○壬辰八月廿五日

士有志於功令爲欲致身而行其志也故先志于學
學聖賢事而善淑其身然後出而用之以盡其所學
而無窮焉今之人徒役心於外至不究其內得雖顯
榮所榮果何事無實之榮朝華暮隕得不以榮況可
易於得乎拋一生於虛偽寧不慨惜賢者旣知欺之
爲可愧則曷不以不欺爲學乎覺得自欺亦不易矣
此其工夫可施力處賢者勉之

答成舜在

璣運○丁酉六月十四日

盛喻開卷徒讀却不知吾身作何物氣象云者如非
體認之實曷能道得乃爾勸書有看讀誦念四者讀
則心目相應看則心目相應誦則心口相應念者
以心已矣以故念難於誦誦難於看看難於讀徒看
而不讀與不看同徒讀而不誦與不讀同徒誦而不
念與不誦同默念其文自能思索其義蓋學原於思
思之思之又重思之馴致萬理明盡心與爲一是乃
究竟法也

答鄭衡七

璣淵○癸卯七月十六日

向示動靜之間逐事差過者覺得如是蓋亦難矣覺

之後何過差之有吾輩用工不專在於記誦詞章言語之間祇當體貼身心發揮萬變是其真箇用力處到得一疵不累天理流行方是歇脚地頭過是則化衡七乎年力富彊人生難再得垂死無聞視我以為戒銘箴懸吐如是無妨而辭吐俚多者亦我方音也中華只句絕而已然則尊德性銘汗卑下一引上呼亡云者恐未然求放心銘成之在我不必濫看成仁成工之意者未知如何敬齋箴瞻視猶威儀云者盛見得之而威儀在我瞻視在人之異其意耳不東以西弗貳以二盛見得之精字他本作心恐誤耳筆書

以若昏憤有何腕力可以副盛意耶白還未安故茲
依示染墨以完

答郭士彥

守斌○癸卯十二月二十二日

示諭縷縷可認進修之彌篤魯論七篇於日用工夫
最爲親切將諸子問答作自己上當日親承則受用
無窮矣輪流誦讀無或放過

答孫謙叟

柄鉉○甲辰至月

吾道之所寄不越乎言語文字之間而亦不可以言
語文字求之當體之於身心究極乎事物以思傳之
五不措爲日用節度則厥效自在因覺之中賢者勉

乎哉示託譜序顧癘淹床第神隕精亡僣同未冷尸
恐無以副勤教第竢陽德既回如得一分生意當應
仰副矣

答宋繼祖

鍾述 壬寅三月廿八日

程子以心使心之訓此從用處說而以與使在一心
禪家觀心之說彼以體上說而以此照彼終是二心
之病然愚見未知其合宜否也

蓋吾道主理異端主氣抑氣扶理孰不知此而近來
爲理氣之論者多流於認氣爲理而靈與神皆屬之
理理占氣分爲作用之歸切恐非細憂也

答金敦夫

重鉉 ○ 己亥四月

船遊韻詠之有餘味甚喜然此猶外也賢有志此事
彌勉其力實有真得則自有好消息有無窮既已

答金潤汝

海林 ○ 庚子閏八月十五日

示喻不省門外事一切付之於聾聵處此世之良筭
而恨不移醫病手法以醫俗也賢再從侄相見甚喜
其資器慾好可以有成而但其重侍食貧無以專意
書籍然志立則何患其不濟也

答鄉校會中

金慎獨齋趙重峯兩先生陞廡時
○ 甲申元月二十八日

兩先生陞廡東西位次既有所講確而至若奉安時

儀節有未敢質言奉安與大享自是兩項事今有封
下香祝是奉安時香祝耶抑權宜並行於大享歟且
祝中措辭未敢預知而今日地方官不在則誰將代
獻謹遣儒生臣某一句語終不若有官職者當之

答夏士涵

泳極中

祥洛
◇已亥三月九日

悅菴公所著八禮節要以若綿力克竣刊役僉賢爲
先苦誠令人欽服而又此蒙惠尤庸感謝僕僕

答下守南面諸友

◇丁亥閏四月七日

飲禮古禮也而所以備酒禍也一獻百拜亦云勞矣
以不得醉焉豈非可好耶村間酒席種種生弊雖一

日一行未爲多也而今鮮有行之者無乃講之未熟
習之未易以致禮廢而俗渝耶及聞貴上斷然欲行
之甚盛甚盛

與南山洞人 丙子

洞居徐覺汝之逝也其在室女血指而甦得延三日
命竟不能無死命也雖孝子女亦何爲哉世之血指
者何限而亦千萬人中絕無而僅一二也天下之人
孰無父母臨死之際其痛迫冤酷能辦此而不知有
身者其心即至孝純誠根於天者也以人而行為人
之道是固常也而在他人觀之亦不易得也況在女

子者言里有此等人豈不差強人意乎其在勸俗
之道不可無一言將率同里同面籲于營府使之聞
知聞孝女方在病指而又不能得食飢困將死云可
哀可哀世有一等風義人則必於此等處有以用意
以媿夫爲人子而不順乎親者矣累日靜聽無人說
此事者世俗之陷溺可知幸圖所以揚善之道也聞
孝女在平日其行有可尚者多云細細採探可也

臨齋先生文集卷之五

臨齋先生文集卷之六

書

與朴昇東 義初◇已亥四月旬日

所樂在甚事擲梭光陰會不饒世間虛老多少英此
古今志士之歎而高明恐亦不免矣皓首無成則散
跡江湖共尋鷗鷺之盟是亦自守義諦花園賞花臺
吾州第一江山自新羅以後數千年荒廢不擅勝蓋
有待也今十七日諸友設小會招携諸名勝爲木道
之遊此會非高明無勝勿孤苦行

答朴昇東 癸卯元月十六日

高明當紹述庭謨真心實踐一以就自家百年志業
一以副後進十分期仰此外無他道理真見得世間
瑣瑣如太虛浮雲則自有據依跟著欲罷不能諒會
否

答李華祥載重◇丙子十二月十一日

今朝得三悵事久旱而得雨也得意中人書也又得
良朋回頭消息也務諸內而無慕乎外求諸近而不
墮于遠則自然認得乎為吾所當為有欲罷不能底
意思也人生世間上下千万世此身其再來乎人生
不向今生度更向何生度此身其言真切為一誦之

答李華祥丙戌六月十一日

吾輩進學上遲疑等待卽痼症此蓋欠勇奮意思而致然人於事事做不得者皆此病爲祟高明旣知勇邁不足之爲病何不爲不如此爲樂乎公山之明日又明是何足爲念志學之今年明年此甚爲憂耳第竢暑氣稍退濯足琴湖觀魚花潭仍與諸友攄盡平生之好而終是老情非復少年氣象是可恨也

答李華祥庚寅午月二十七日

月村禹友汝七經義見得分明說得精到往往有難及處今日吾鄉有如此人可相賀幸與之數數往復

其進益自在罔覺之中

理與氣合而爲性而單指理處謂之本然性又曰氣質之性既是性則不可謂之已發又曰未發時本然氣質俱是未發已發時本然氣質俱是已發又曰未發之時所謂氣質之性何處著落發又曰未發之時氣質之性不得用事依順本然只得有善而已謂之全無則不可也此數節緊切講明者而覲得本然氣質如何其餘不辨而自明矣夫理隨在氣質中得性之名而性是靜體上言而卽各具一太極也其善本善非因氣善而善者也然靜體上氣質亦一歸於湛

然純一之地即心體虛靈洞澈不爲掩累於本性之境界也故性之包在放心者自保其善而不必單指也此時雖兼指無害爲本然性也人苦不知氣質之變化莫測而固守稟受時清濁意思不移既又帶累看氣質故言本然則期欲去氣一邊而必曰單指天下既無離氣之理然則此本然性終不免頽舌上空言而其實長在氣質清濁中看其可乎哉未發靜體上心性俱爲純一不雜故曰本然性已發動用處氣質始用事紛紜雜錯卽心之或凝於水或焦於火之時也故性之隨以發者爲其所掩不能自保其善

理弱氣強故也故曰氣質性此性字兼動靜體用者
蓋氣之有體用本末卽理之有體用本末而理之純
善貫乎體用本末者無爲無妄故也氣之清濁異於
體用本末者有爲有作故也動用之際紛綸騰倒故
其所隨之理為氣質性靜體之時虛明洞澈故其所
包之理為本然性性本然處氣亦本然曰心之虛靈
知覺一而已者是已用氣質處性亦善惡曰不全是
性之本體者是已本然氣質地頭雖異而其為性一
也豈有未發時齊頭已發時并立之兩性乎莫以文
字求之體驗於自己上如何

蓋衆之本體清而其或清或濁生於動處氣之清濁亦有是已且氣之清濁非清在一邊濁在一邊只是動用處或清或濁也

性則聖凡一也相近云者兼氣質而言也以一般之性兼氣質之不同故曰相近氣質之不同非分殊處乎分殊當屬已發

入之有生之初便有氣質之性若謂之已發則人之一生專無未發時節乎云云此一節正好一番說破蓋氣質雖稟於有生之初苟有未發時節則氣質渾化爲本然但凡人未見有未發境界不昏昧則便紛

紆只是氣質用事大本之中何以得立也盡存養省察之工然後始可以語大本大本既立則余亦堯舜恨不能盡存養之工耳

凡看文字平心誦味有時而得之文字之外人見苟有得則取以爲己有不可容一毫私意於其間安知必是在我而必非在人耶義理天下公百世公眼有可畏也取諸人以爲善大舜所以爲大也

答禹夏輟汝七丁亥十二月二十五日

覽史孝悌之行資器之美苟能一日實用其力焉希賢希聖固無遠之不可屆今不能然者流俗害之耳

立志不高未克奮拔勇往畢竟只得鄉黨自好者
貌樣詎不可惜耶如欲觀宗廟百官之美富當先得
其門而入豈宜彷徨門外進一步退一足趑趄而不
前耶賢史年齒亦不淺鮮今年明年更待何時少壯
光陰尋常遣去老大追悔有不可及如僕之老悖亦
足規以爲戒卽從今卓然自立無或遲回等待

與禹夏轍

庚寅七夕

來論氣質之性或以稟受而言之或以已發而言之
云云蓋性本然氣質無論稟受初與後其未發已發
境界只一般底道理夫天人一也天氣地質之流行

非清者粹者濁者駁者各相雜糅只是清粹而或濁
駁濁駁而忽清粹一氣動靜陰陽互根相軋相取相
合相乖有寒有熱有香有臭變萬化生於動運流
轉太極之用所以行而在人則氣質之性也其冲湛
精爽之本氣本未嘗不存於靜定翕聚之中太極之
體所以立而在人則本然之性也聖人之生清粹之
適值也衆人之生清濁之混淆也至清至粹之稟性
之本然氣質無間於發未發而然罔念作狂亦有純亦不已
之或清或濁之稟性之本然氣質隨變於發未發而
然克念作聖有已百之工今以氣質之清濁而無變

於靜體則本然之性無地立矣存養之功何所施也
試演是說而反覆焉人生之初旣以稟受之清濁理
墮作氣質之性此性安頓在氣質中實地矣及其言
本然性則喚出氣質中性除却清濁氣脫然獨立於
氣外喚做本然性說時容或如此說究其實著地果
安在哉本然性不存在本心而竟作離心之性耶不
歸空言地耶惟其如是故言本然性必曰未發未發
者氣本冲湛處也歛用還體處也清濁無本色而搭
在此境界者即本然性也惟其如是故言清濁則氣
用事邊也氣用事則氣質已發矣而本然之性乘此

而發者爲氣質性也然則未發已發雖稟受清濁初
只一般底道理也雖以赤子心言之無營欲知巧之
思而動靜無常非寂然不動故程子謂發而未遠乎
中況以衆人恒動無靜不昏昧則便紛擾氣質用多未發境
界幾乎不見而其能存本然之性者幾希然以孟子
夜氣平朝之氣觀之其本體之善未嘗或息於靜存
之地敬以持久人一已百畢竟氣質渾化爲聖爲賢
實在於斯噫相與勉旃哉

蘆沙理氣說如羅整菴理氣一物者而期欲磨滅氣
字而曰主理則畢竟理占氣分爲作用物事曰分殊

理也善惡理也動靜理也履霜之漸實非細故

答具達書上弘○丁亥八月二十七日

處育英之地所做爲有可以副人之期望耶未得托
芳於隣竟失源源良歎尚德祠素以吾鄉崇奉之地
而今有異說云果否卽爲探知

答金錫泳 致範○戊戌十月四日

賢亦年漸向衰髮亦種種年來所得其有妙諦真詮
可以藉手見昔賢急急如不及惟恐失底意思恒存
諸宵中無或因循悠泛以度晷刻人生輒到七八旬
祇是戢木物志不率氣事無可做今自當之始覺其

非用鑑前轍無貽後悔也

答金錫泳問目壬寅十二月二十九日

中庸首章子思立言專就本然純善之性原於天而形而上者明之初未嘗帶氣說形而下之器則心字之不說出恐或然矣然朱子於章句備言理氣以釋之心之名自在其中矣於序文引書之人道心發明之其意槩可見矣

答李相軫廷弼○庚寅十月二十七日

高明固有志此事者有志而志不立則靡風之草未或自持且學問與科舉義利兩塗未可兩占便宜兩

無所成夫左手畫規則右手不能畫矩右耳辨宮則左耳不能辨商羿善射也而慕御則射不若之矣伯牙善琴也而學竽則琴不若之矣事不可以兩能能不可以兩精技藝猶然况義理之學功令之業勢不可以兩立乎不若早謝進取專精向道究極乎千聖相傳之旨設以扶百世將墜之緒辨得此一大事業爲吾人不虛生之義諦贊身癯筆腐至於勤托之文無以自力旣以固諾誓不食言

答李柄運

德七
庚子正月十七日

示諭措辭遣意非不欽誦而但屬賤身處太不稱停

學以務實爲貴浮慕虛獎豈喫緊工夫耶吾儕更不以是相加惟以篤志踐實相勵卒就遠大之業

父在母喪十一月練十三月祥祥後白笠白布直領白布帶至十五日禫禫後黻布笠帶是爲心制也通計二十七月爲限至翌月朔復常九菴先生所訓略擬於心以爲節者此也

再暮似當依忌祭則行於雞鳴時其或可歟

再暮祝式老先生旣云只用常時忌祭祝而用夫告妻之式則遵而行之恐無疑其或有措辭行之而未敢議到

與禹成東大建。甲辰十月。

寒事漸劇，旅中啓處無愆。日下爰衆不見，是圖士生斯世，不能發一策以扶國家之急，而老死蓬蒿之下，何以士爲？然旣不見用於時，則只當窮居畎畝，翼翼樂堯舜之道，與聲氣相同之人講習服行，不墜遺緒可也。賢今日之行出於不得已，前後獨賢之勞酬報無計，是可恨。是亦賢苦勞餓乏，畢竟玉成之資，幸彌勉努力。

答尹奉周

明肅。丁亥二月晦。

盛課壁經熟覆潛翫，益臻佳境。高而天地日月轉運。

之度大而二帝三王致治之謨包括範圍靡有餘蘊
否讀書之法一字一句不可歇后放過究極到底然
後渙然而釋怡然而解始為自家有矣聖如大禹而
猶惜寸陰吾輩至愚也當惜分陰如賢者年富力強
求吾所願何所做而不濟不以凡陋自沮莫以流俗
自奪終做得第一等人觀賢資器慙好不容無奉勗

答尹奉周

華函忽墜讀八九行至恐有終身不返之歎此句語
雖尋常過口發之於吾心懔然雖百年奔忙極盡一
生富貴皆虛偽耳未若守死善道以守吾身之為可

寶也今吾儕中意勤志篤無如賢者終能有所望
非輕千万勉旃丈夫不爲風氣所囿庶可爲矣

答禹孝島

教彥○丁亥四月二十七日

匝一月而再接英儀於講讀之列揖讓之席固已目
屬心寄而苦被膠撓酬應不暇罔究所蘊常以爲恨
書來乃一般緒懷也從此而倘復有攄叙之日耶以
賢之資器如彼其美工業如彼其優而不以自多聞
然自晦亦可見其高人之此事卽爲人上當倣底道
理豈有天下古今之爾殊爲之則是勿以流俗自奪
勿以謏陋自沮視法於禹惜寸陰而更惜分陰

所詢疑節既有支孫之子則繼為長孫之后為曾孫
承重禮無疑雖年幼古有以衰抱之文今以七歲之
兒顧不可以臨喪承祭乎如其未能死者次子出
后為從子者可以攝行亦無不宜諒之如何

答禹孝禹

癸巳元月十六日

明窓斐几有淵求之趣否書以翫閱為癖未若以身
體之之為尤好靜以養氣敬以養心真實做去

練變之節自儀禮家禮至脩要及先儒之說互有不
同而蓋練服用練布改製而家禮無受服闋文也不
能新製仍舊服用練亦貧士通行之規庸何傷乎正

服不練說誤之耳。冠經衰裳無不在所練之中。
太極之加無極二字者以明理之無形象無方體也。
非太極之外復有無極也。邵子所云無極之前陰含
陽有極之後陽分陰者。卽以氣言。非若濂翁之專言
理也。今或人之無極上復有物云者。其亦從氣推去。
歟。理無形氣有形。吾儒家定論。而或者理氣都無形
狀之云。何所據也。氣或目之而無視。而嗅之味之熏
之。無非形見處也。

答尹永植 錫老 ◇ 甲申七月十五日

人之爲學甚不易而亦不難。只在吾立志之如何耳。

志苟立矣則其進學工夫之規模次序盡在先聖賢垂示立言中矣熟讀而取法焉今乾坤何世爲古今天下一大變局而吾道幾乎熄矣爲士者固當矢心求道斃而後已千万勉旃尊庭先猷行旆未知何日返稅而其間不無幹蠱之撓然日用事爲皆人所當做用工得恰好處卽此是學以施諸天下國家無所處而不當豈徒曲跼迂踈之爲可貴贊衰病如前理義無窮日暮途遠之歎有不可堪安得與賢輩相聚講論以送餘日是則不能無歎於貧乏也今來夏繼秀才端雅可愛直有受吾也幸與之同歸也

答禹夏昌武賢

惠問感荷謹審歲暮旅履清裕贊癘淹床第嘆下一
縷僅存秋毫也俯示問目可知賢雖在旅苦紛撓之
中不忘用工之勤也遊京洛者類皆浮薄懈怠而賢
獨不然可喜可喜問目待病少間貢愚寬暇

答楊在輝希道○丁亥

槐忙漸近倘無舉業之苦否科舉是何物困人何若
是之甚也待下之情自難頓廢然無為此所役大丈
夫事業豈在區區一小成哉俯托筆書苦筆不從心
當神清氣好時一爲之試腕然此亦儒者事末也何

足貴哉

答具昌書文汝◇丁亥

工夫云者不專以誦古書著時文爲言就身心上密切處究其合道理與否也然則日用萬事酬接間亦見其工夫也無徒爲口角上過去說而實着脊梁如何科期日迫或恐爲外慕之念生於耳目而是亦循理做去不爲所役則無害知其內外輕重之別則自無他患

與李定祥辭一◇壬午九月

近來翫閱在何書無時不散秩之會無處非掩卷之

塲青春好景寸惜其光白首悲涼視我爲戒則如我者亦足爲人鑑矣

答杜僖賢道原◇庚申十二月二十日

伽椰山色青八書帷這間真趣與書味俱長俗冗汨沒舉不免此患工夫正在此等處處得其當無至攸奪如何

答金錫龍敬緝◇丁亥閏四月

將何工夫用當抵年之日自以多事爲言則世間本無無事底時亦無無事底人就事上用工得力方可謂大丈夫醉生夢死擿埴冥行拋一生於無用之地

非男子事幸須念之勸人好茶飯而不喫則亦無奈何

答禹纘基

太有。甲申七月十五日

吾輩以草野編氓既無可仰之樺又乏負郭之土所賴以延朝夕之命者只數畝山田於此稍弛其力雖稔歲猶不免顛顛况大無之年乎如太有仰事重庭俯育諸眷尤有難堪處矣帶經而鋤晝耕而夜讀如古人攸爲究書研理未若專精致一而志苟堅着則在耕而見其叅於耒倚於耜耳何必枯坐唧唔兀兀窮年累歲爲望哉

尚書之尚字尚古之義精一執中著在大禹謨蓋二
典所未載者爲大禹皋陶謨益稷三篇以備二典之
未備

答杜相賢道一○庚寅三月十五日

中庸與誠明分爲二篇其義何如

天下義理自朱子後又一番整頓釋經費平生精力
各極其趣始有歸宿使後學不迷所由以幸天下萬
世矣王氏之分爲二篇所謂自陷於吳楚僭王之誅
不必更論

答李柄達

德漸○辛丑十月二十七日

敬身之身字不但身體髮膚兼行與事者而行較重
故篇首以丹書敬怠義欲言之

分無求多之分去聲為是非分裂之謂即平均之意
直而勿有有字自是已見據而執有之意

勿旗之退三軍以字形言而朱子釋之以禁止辭則
工夫只在禁止上

九患九容之色莊溫不同以其患與容之異也其容
則莊其患則溫而和嚴互濟非寬而慄之意乎

敏於事之事所包甚廣日用事為罔非事也而其下
結之以好學二字則學問邊事尤當敏勉

樞衣趨隅隅席角也只看席之何向從其便置之隅
隅無一定此不敢正當席之意

烝烝乂不格姦此史氏記實非舜之言也似父之使
字下不穩當

枝葉之庇根本子孫之孝父母皆自然之理也故爲
人子而有一毫未盡於孝則不可為人草木不如之
云不亦宜乎

學之有次序階級是爲下學而上達故先從灑掃應
對始晚學亦從事於小學卽此意也若曰存養曰德
性曰格致等說就工夫上說也今人都無基本上得

力徒以出入於四寸間者爲銜鬻之資此世所以不復三代也

吾儒之學自有心法相受心地得正始可言學其或用心偏僻私勝無公正弘毅底道理終不免小人情態可不懼哉

答孫致鵬

翼濱○戊戌十一月二十六日

學業鹵莽爲憂旣知其可憂何不實着心堅着跟爲進步向上之圖而徒爲過口之悔空書之談也十丈狂塵非一蹴可超惟我一丘方寸地虛靈炯澈便是自家清閒境界存養得許多道理做出來可使羊腸

灝灝爲平坦順境只在操捨之如何有志而志不立則終是因循等待竟濟得甚事此爲學最爲魔幸卽改轍努力躋攀

答全斗漢仁澤。庚子十二月

士貧甚則奉率之地不能不動心而從古安富尊榮而能成就之者幾人舉多從苦勞饑乏中做得真正大英雄矣學豈別件事耶祇在日用事爲間做合當道理而已不曰行有餘力則以學文矣乎外是非爲己之學董邵南朝出耕夜歸讀古人書此見稱於韓昌黎者也是可爲法蓋志不立則終身無所成此志

卓然自立以爲聖爲賢自期雖天神呬呼更不他顧
便有進步處幸加努力用千萬吾往之勇

答禹夏教允欽○甲辰六月日

聞賢善居喪食素至今平居不脫經帶此古人所常
而今人則鮮矣聞不勝贊歎而今人終不若古人稟
受是亦量力而處之無至有損爲學不專在兀然枯
坐眈看墳籍而已明理在書窮理在心窮得盡萬理
處得當万事可謂有爲之學無是則所謂士爲無用
件物存此意思遠觀淵諒贊此歲來此心無寧淨時
節量境病發于身涉朔便出沒鬼關近稍回甦而完

人則未也。雖使得完從遊，更難如前日矣。可歎。

答禹夏教

甲辰十二月三十日

人生世間俗苦，何以免得。惟在此心卓立，更不顧他。一向進修，如猛將鏖兵，酷吏勘獄，然後始有好消息。彌加勉強，旃賤狀過一宵，爲九旬行人。其何能久。視受贄之禮，古多而今鮮矣。余安可爲人師。且先輩不以師道自處，皆以朋友之義相交也。余初拜先師，亦請此禮辭。以如此且實心相從，則自有相長之道。有其名而無其實，不若無其名而存其實。

答林載鉉

致華○癸卯十二月二十九日

盛業之爲俗冗所妨奪孰無此患只在我用工之如何勿以外誘所引去則此心寧靜遲修日就何患不到前修地位入於少也以眼前歲月許多每有姑待明日之心則因循之頃便到老白首雖有窮廬之歎亦何爲哉賢亦少壯能幾時視我爲戒也

答李鍾澤

子宣○辛丑至月二十八日

示諭縷縷說得直切如是可見其有實用心處志氣如千仞之壁卓立襟期如萬頃之海恬靜自然世間萬事瑣瑣有不足道安有大丈夫事可與俗下輩較競爲心術之病且志士不忘在溝壑飢寒徹骨亦不

以動心惟患未聞道耳

答李鍾澤 壬寅二月七日

八公山靈淑之氣委積於琴湖寧同之間其地即貴
居也士之有起於其間者豈偶然哉勿負天降之衷
入受之中浪拋百年物件

讀祝吉祭前屬甸事故尚右右陰也自吉屬吉事故
尚左左陽也神道以西爲上故校宮從享四聖列安
於東一行而虛其西位後來東西分陪其勢不得不
統於尊而爲今例歟

小心畏忌不惰其身八字家禮自小祥至禫皆有之

而非獨小祥之爲然我東先賢或有不用八字矣
大歛左袒遂菴曰此制肇於儀禮而左袒之說始見
於春秋之後禮家遵承古經則夷風之嫌何必言此
訓可從飯羹左右雖曰事死如生三年內則可而祭
則神之左設何可違也

被髮果是蠻俗家禮會成雖去之然行之已久久則
難變今不可議到

文廟從祀諸賢之封爵雖曰自元而尊以行之已久
豈以瀆神而遽加削去恐無未安之嫌耶退陶亦有
此等訓

小學不與爲友友字以朋友看恐是好色二字果太
露然文義無未安耳

答金岡玟

壽亭○戊戌八月二十六日

時文既無所需則更不必矻矻爲役而世人祇知以
文爲士不知以行爲儒儒者之行所以學爲人之事
日用事爲罔非是物也不曰行有餘力則以學文乎
賢有孝友之實學求如是而已更學他別樣何事耶
然書以明理故不得不讀書聖賢許多道理盡載此
書書安得不讀所可戒者只汨汨於四寸間而罔究
其源也心是主宰一身酬應百變不於此正萬事便

虛偽故心法相禪千古皆諉幸賢者畱心焉

答全柄坤得中○辛丑十二月日

示諭求助之意若是勤摯而愧無可副之實惟真心
做去自當有進步之道勿以俗故妨奪勿以貧累自
沮終就遠大之業

答柳載坤亨基○甲辰三月日

庸學之就事論誠就心論敬果如所諭而惟其誠而
有所齊肅者敬敬而無所間斷者誠却是誠外無敬
敬外無誠以是推去似不至大謬矣

答黃甲性乃命○甲午三月日

我東舉業氣數成法故非有高蹈特達者不免陷於流俗之科臼耳是以諸儒先正甚言其害以杜奔競之弊然學者狃於聞見習以爲常若敦厚好古之君子壁立千仞要不入於頽波之中則斯文爲幸不其大乎且異說惑衆何代無有惟恨立志不固耳第八孝出悌之餘杜門省書與古人酬酢則何容暇及於他外役志哉

答朴桂晟

明重口戊戌十二月廿八日

示諭有以見求助之勤意一此做去何事不濟顧此事非別件事物卽吾人本分內所當爲底道理而入

苦不由認以高遠難行之事或有志而不立或半塗而旋廢茫茫墜緒無復收拾之日天下英材非不多矣其奈實地上着脚之無其人何哉如賢者資近而志篤昔非不足而從今努力躋攀固何遠之不可屆也讀書究其旨義而勿役心於訓詁玩理造其高明而勿寄情於口耳以至成就得一生事業

答張永淳

壬午六月三日

書至認近日調節佳適少叙勞煩示諭可見工夫進處然爾於上達處用工長長還爲短未若從下學人事日用切近處做去試觀古來學道而差者夫孰非

知之過耶故吾每放平日爾好說理氣天地度數而
無論其言之得失默而聽之無一言可否者其意欲
爾之不急急於此也况爾年今十八矣雖博學當內
而不出敦行孝悌而已且觀物玩理是格致事豈欲
不畱念耶然遊心玄妙不能無戒於初學也示中語
屬賤身處其言皆切當出於篤愛可喜可喜吾豈不
念及此而但有沒不得不行者聞四月又行先師緬
禮於始興地云先師之墓千里一拜餘日無多况家
兒來時先師嗣孫有書而言及地中事甚詳舊悵新
慟久難自堪今於兒子會行之日騎率同往則父子

相依師生盡情於是沒意作行將以初五發程歸期
當在來念間一哭辭師墓再拜別漢陽歸卧林泉以
終吾年是至願至心爾其諒焉

答申鉉穆

晦仲◇丙戌九月五日

示諭辭理俱到愛玩無窮大抵爲學非別件事只是
日用彝倫職分之所當爲者竭盡其道理充擴向上
去極至處便可到聖賢事命數窮通非可論已然則
只看吾力不力如何若先有計較而自勸自沮終不
能濟得事人生別般事業在人事得盡處徒空言妄
念何所補於自家古之人用工其心舉如是而已幸

熟慮之郵稿繕寫非係急速相對第可商議

答申鉉穆

辛丑十一月二十一日

從速一面情願甚切衰懷易弱而致然耶邇來書亦不多施之而不見報則撤耶思想之極出言有若尤人九秋書今始得審將赴公隆寒供職旅履無忤臘初休暇何至歲暮返省況吾相面期以明春少時歲月悠悠眼前顧待符者朝暮耳趁速圖之

答杜炳夏

忠伯◇己亥十一月

連日不相見懷伊政苦寂寞之濱惟君相從爲樂彌加調攝斯速食效疝症少時例疾以忘生徇欲爲恥

昭示

卷二

則疾自去

心性初動處是情緣情計較是意情意非有二也心性兼言者動者心也所以動之者性也但情從性來意從心來故情則善而意則有善不善耳

答杜炳夏

癸卯南至后二日

山寺讀書此少時樂事而其時不知其可樂及此衰病始知此生更不得做此樂窓明突溫居處甚便非不好而恐情慢易長昏氣易乘此不可不念恆以瑞巖和尚問答主人翁惺惺爲法亦好

與金粟基

致洙

所讀了得幾卷皆成誦否今已歲迫與孫兒撥還可也見君向書大非前日阿蒙一此爲志豈徒書辭而已其所造就有不可勝言幸勿以一時意氣爲使實做得無限好事也

答金容鎬

元巨 〇 己亥五月

示諭縷縷可認其勤篤之志有不自己底意如是而其有不成就者乎幸益勉進用副區區懸企雲村遺稿可至四五篇云奚必多爲早早收謄成冊則當一閱矣

答金永振

德遠 〇 壬寅二月

示諭已爲詳悉可知其有進無已底意寧不欽艷哉
但學問之方勿爲泛泛請益祇自審問愼思則於道
有進自有無限恰好處如今日下一工明日下一工
無所間斷則沛然孰能禦之大略如是而已

答沈能沂

善與○壬寅冬月

汨沒塵臼看玩不篤此通患矧又歉年惱人心術能
於此用力焉則始可謂篤志好學無徒爲過口之說
而彌勉實心做去是外無他所望于高明諒否

臨齋先生文集卷之七

書

答崔柞膺

可胤。庚子四月十七日

內喪雖同姓若袒免之外則遽爾入哭有所未安況異姓無戚者乎然若平日有通家升堂之分則許以弔哭亦禮也叅酌處之可也

承重孫妻無論姑在否而從夫服三年姑在則不從服云者有先輩之論然愚意從從服之說

本生親無后則班祔宗家禮也若所後之家非當祔之親當祭於別廟今人或以出繼子之次子還爲本

生祖後蓋有父然後有祖此子將以何人爲父而繼其生祖耶先儒之論甚嚴不可違也

網巾歛髮之具也其制出於大明與古之纚相似開元禮及杜佑說邢布巾哀巾帕頭者此也遭喪者至祔祭主人以下沐浴櫛髮則此時用此不無依據故備要已言之耳報葬者報虞三月而卒哭則卒哭後祔者布網之用待祔已矣

答崔祚膺

庚子四月

雖一日間父先亡祖後亡則當服祖三年若父亡在後則父喪成服後卽成承重之服以祖喪未忍一日

無主也不忍死其親之嫌非可論也父喪既葬而祖
歿則父喪題主以凶子當待祖喪畢後改題而同行
吉祭然練祥禫祝當用子祭父之辭練事前日因上
食告由當云孝子某敢昭告于顯考某官府君始喪
題主顯祖考主喪以其屬禭書之矣顯祖考不幸以
某月某日棄世當待祖考喪畢改題而自從明日小
祥謹用子告父之祝采增罔極敢告家禮增解未忍
死其親之論先儒多不取

答安舉

○戊子至月廿三日

先師續集事非不爛商而有難粹乍議到者蓋力有

所絀故也。愚意編次幾弓出正本以俟後日。亦一道而顧無人任其役者。如我素以見識踈短。更毒荐臧些少精力。隕遁無餘。恐無以卒就其功。示中才神二字之義。高見甚的。孟子專指其發於性者言之。故以才爲無不善而終是形而下者。如程子所謂才稟於氣者也。然則不得不與神字同看。其地頭而神是指本心靈覺底。才是指運動能爲底。神則與理無間。才則與情爲合者也。才比神有能爲作用底意思。而隨所指而異其名也。然神與才俱以該體用貫動靜看。恐未可分體用也。

答安羣

庚寅五月十六日

先文遺集掃塵之役非膚淺所能及詩與書牘有商量處此則惟高明精力所可自效異日相對當真愚國恤時山野望哭之無位無拜盛見得之

答禹圭煥

舜謙

○壬寅十二月旬七

歸故山指期不遠從此展晤亦恐不易示諭善欲行惡欲去而未能勇行剛克者固知用工之彌切百倍其工安有不得力者乎勉旃哉年行七旬釋家所謂前程忙念佛勤異教猶然矧吾儒家計乎

答李圭暖

叔賢

○庚子二月晦日

讀書而主經文不屑屑於訓詁是先輩劬經之義諦
蓋先究本文旨義之歸宿以立吾所見何如然後更
就訓詁而細賸之自可覩得其得失不爾則紛然諸
說已牽去吾精神不勝其繚繞矣然則賢者今日用
工可謂得其要矣格致之先於誠意者爲其心之全
體大用無不明理明心一則自然所發真實何有不
管身心徒馳騖於渺冥而曰格致者乎外身心而格
致非所謂真知實得也

答李圭暖

辛丑至月旬日

以賢之才之高且英有志此事不患不到闡奧而但

學者之病恆在喜博博學於文約之以禮則自無病
弊之可言賢者應知所以進修節度俯示衣製之有
古今懸殊此隨時損益之所由致而吾東道袍之盛
服亦僅三百來年前則團領直領爲上服今不可據
以爲言浚衣是最古之服吉凶皆通用已爲禮家之
規則祭賓燕居無所不宜而但士之祭服無出道袍
此可遵俗燕服之狹袖周衣已爲時王之制然愚意
則有袖可也不然浚衣似好

與申壻漢朝靈伯○丁卯十二月六日

鄒經不但文章好耳以泰山巖巖氣象瀾用天理王

道底大手段卽孔聖後一人其氣象太高難乎爲法而猶學之則可企而及也雖不及亦不止爲俗瑣小丈夫耳學及孟子其言雖似不遜而不曰聖人可學而能乎故云堯何舜何有爲者亦若是也是在人自力之如何勇自擔負豈有不成就者乎靈伯乎勉旃勉旃不止作俗下秀才也如我四五十無聞者而惟所望後生可畏何日相見講討示以前期也騎率誠難堪步旣健壯徒步往來也日行百里習以爲常亦運臂之餘意也

與申漢朝

庚午臘月

女阿甲孫善在而解婉得男子否漠然不相聞真天涯地角也他日君亦嫁女應知今日此心苦也想其房室冷甚外風難防幼孫輩何以經過茲手造簇子一坐幃畫簷松蹲虎二物皆貞固傑特者威節俱歷倒百物昔朱先生付黃輅以畫獅願其似此獅子奮迅哮吼令百獸腦裂以今所贈松虎亦此意也揭諸壁上使甲也閱覽也前日渠在此時見壁上畫虎手指示在傍者曰虎也虎也有若恐動人者然矣今每思之渠氣象軒昂有所取於斯者矣善養此子以大君門戶也翁愁惱百端不能盡道然古今天下元無

無事泰平底人人生自爾多惱固任之不必爲問

答李善燭

善行
○癸巳十二月二十八日

贈職焚黃今俗皆告墓而行於廟中禮也 恩命難
於久宿今於節享行之恐無妨既無易世遞遷之事
則喪中恐無不可改題況紙榜乎今因節享題以贈
職告由祝辭當云維歲次云云顯某親贈某官府君
今歲某月某日 教旨有此褒贈惟是音容日遠追
養靡從祇奉 教書悲喜交切敬錄以焚益增哀賈
謹以云云

答朴昌鎬

○庚寅四月廿四日

俯詢衰衣方領在四禮便覽新製圖一依製之而究
書按圖猶或未盡詳只解布準尺寸裁縫去如今常
服製樣則其綴領之摺轉成方自中圖式用紙製去

與朴昌鎬

乙未二月十日

方今佩銅符任專城者敵至非哀辭乞憐則棄城入
京師王章不明此輩得全首領惟阮府令獨守孤城
不顧一身捐生輕於鴻毛取義重於泰山其貞忠夸
節足以聳動一世爵謚之典當有次第之恩

答禹堦夏績

汝九〇巳巳十一月

審重省佳勝欣慰尤有所祝者讀書勤三字耳昔非

不足而彌勉竿步則甚甚幸幸汝九乎吾於君以誼則婦翁也以年則父執也若言其稍涉工程則亦可繙先進也於君乎豈無片片赤心說出來者耶不耕令人飢不學令人愚耕且讀勤其力世間至樂此外更何求哉翁四五十無聞焉回顧茫然祇憤悱如山已矣必視我為戒卒就遠業做得上仁里上仁人也筆書於儒子事切近雖不必役心要可需用亦須畱意焉可也

答孫廷頊大勛
廷台 舜日 〇 癸卯

葬於三年之後者葬之後月行練又後月行祥而禫

過期則不行禮意然矣今魂床既爲永撤葬於十年之後則當以緬禮論之只有安神告由而已

葬日適丁忌日則祭姑停之而擇日在我則何至相值耶

與李極壽

錫老

聞孫兒言君欲謁樹墓之文而爲恤人言藏心不吐者近二十年云果否無傷也吾書之昔金時鐸出入寒泉之門請其親墓表於陶菴先生門人難之先生賢時鐸之爲人也許之君之孝親之誠吾每感歎而不及者也且禮墓表士庶人共之矣昔歲先師於君

眠於茲三之二
之先世碑帖文字屢書而不一此何人言之恤哉然
君謙牧之德尤高人一等吾平生凡人文字之請遊
從請益之事但審其人之善惡未有以其所處之如
何而辭受焉家錄皆一一携來也

答李商述

◇辛酉二月六日

環顧人間世吾輩世界自是別世界等拋一邊無人
願立而賢者獨畱心欲一踐斯境身教有從此可驗
矣斯道也天下之達道也首車而行自可造矣須硬
著腳跟無或遲回等待賢者自有家庭所受以父子
之親兼師生之義終做得西山之九峯贊妄不自量

謂堯舜之聖人皆可爲初心發願不後於人而年光
荏苒志業荒頽虛負半生無聞斯迫自顧瞿忸無地
自容賢者視我爲戒努力躋攀

答金昌芸

○癸未

示及疇曩遊從之樂覽之自不禁侵侵靡適之歎昔
於諸先生亦嘗摳衣左右粗聞緒餘今白首殘生孤
寄支離備見天下之爲一大變局奈何各保丹心獻
靖前修是吾輩第一義諦歟華西李公并世不一見
近得其雅言數言有以窺蘊奧矣

答李柄燦

◇壬申十一月四日

盛課三餘強半了得幾弓書也書讀得多自見真味
味之真則見世間他事皆虛浮不足道年富神完如
賢者不汲汲用力於此時則他日雖追悔將安及哉
高著眼大著肚方可濟事

答鄭圭德

◇壬申十一月四日

無暇靜貼豈但爲高明之累舉世滔滔莫之自悟千
村萬落無復讀書聲但見互相奔波吁亦奈何諭以
祇自內訟則能自拔脫而無是也可知矣

答申東烈

道卿乙未

兔園所收可喫大碗不飫春間所遭人家易有之亦

開數運奈何贊衰病轉甚過化是悽樂而亦未易得耳欲無聞目欲無覩尺七殘軀無處可安

答鄭繼憲

。丁亥二月十八日

本庭無主祭人而出后者行祭則稱以從子恐宜

公子及子婦題主稱公子某公子婦某氏云云而便覽曰弟某子某之某字官號與名似當并包於其中云耳

三代俱沒其題主一以長孫爲主諸子非可論若無主孫則諸子中長者攝祭

子婦喪初虞祝一從告子例以悲念相續心焉如燬

書之恐宐

答趙曦濟

明秀○壬寅十二月二十二日

人皆以讀書爲工夫而更不知此心走在何書何徒
讀爲也賢以不安坐咿唔爲恨旣不得不役於日用
事務則事事接應有百變隨遇得當靈臺洞澈是爲
做真箇人

答表鍾玟

和日○癸卯正月十一日

大雪如此其豪壯八旬來創覩正洪正準羣從吾讀
書聲洋溢清秀氣貌在眼不能念講會以今計二發
文夾示可想古來傳說而性山之變城無昨其俗諺

之錯此驗安知不在後日耶今日之爲便是開端歟

與鄭海錫甫錫

辛丑十二月四日

近做甚事天下萬事皆從一勤上做得到來者耳古人
不云乎理無定在惟勤則常有心本活物惟勤則不
死工夫奚但以書爲哉隨事得當而已日用事爲無
非工夫故先儒之於寺鍾庭草皆寓目傾耳而發深
省也

答朴純鎬

德文

昔尹和靖見伊川半年始得大學西銘看蓋古人看
書之不易易如是爲其浹洽於中而書與我爲一非

若今人徒上口舌便認取文字而已今示纔讀數月而便心懦意懶則恐欠究蹟之二何不硬著心大著力以振發精明使書與吾心貫徹洞透至於欲罷不能之境也吳時煥溫雅可愛客接無以副勤可歎補亡章四理字皆指物理看無甚害義或以已知之理謂心上所具之理而心外無理理外無物吾身心亦對他爲一物故其下只云衆物之表裏精粗蓋以物理亦不外吾心之理耳如是互看無妨

答朴純鎬

癸卯

襄禮以安親爲計不可與人爲隻既是先山附葬則

兆下左右無不宜有碍於人而期欲自勝則是血氣所使豈得安親聞廬墓是近世所罕有此孝子至誠所到然亦可量筋力而爲之墓幕不善其力當夏暑濕臨冬凍寒易致疾病是則以孝傷生非沽孝諒處葬後神返室堂則几筵自當在家廬墓者不得不朔望歸奠朝夕上食何可廢也在家人行之耳

答鄭奎錫

士洪

無限苦况又脫得過雖曰目前之困迫而其爲將頭之幸福則多矣勿爲外撓所動恬然自守是爲處世之良策升沉榮枯自有其數非管窺井觀之所能思

到也聞近圖搬移云可知世道之不古人不可與鳥獸同居則環三千里豈求全安之地須要自家心安靜而已

答金教淵

聖燦

美楨尚欠痊勝竊想惟憂不淺少時此等之症恆在不謹之致而惟清心寡欲尤存戒於衽席之間一切世念置之度外方寸寧靜順氣降火攝養之久自有勿藥之效是亦爲學之方變化氣質之道

答金福洪

致五〇壬寅十二月廿五日

雪積窮巷粥飯生涯無屢空之患人之有生孰不有

溫飽之願分定有難力致惟爲善在我在我而不爲
爲不用力焉百斤之力不舉一羽此等人將何所做
成高明既立志堅定勞力向上無因循拖過也心經
釋疑依願而朴鳳在何時有此邊行云耶

答崔英述

子玉○癸巳七月十八日

禮說膳役幸荷勤意得以就緒而心畫若是精雅可
認其所造幸益慥慥無暫弛日早如此歉憂可悶而
餓死事極難志士不怠在溝壑以是爲念外無他道
理守陽少薇蕨惟黃精可採松葉可摘是則不得不
預料也木食澗飲迷春冬古人亦如是耳

與鄭明錫

仲華○癸巳十二月

冰江雪嶺重疊中阻而不能隔斷此心流注朴秀來
略聞近節安吉菽水之供不至有關賤狀恆苦癢呻
而雪牕浚夜溫理舊書是爲可樂以君貞固資稟豈
有做不得事忍得千辛萬苦之地經歷始見有豁步
坦路

答雷壘

文輔○壬寅十二月六日

士之處身之難從古已然然後有以見工夫故曰苦
勞餓之曰貧賤憂戚曰困心衡慮曰恆存疹疾一生
從這裏過可見有成莫之致而至者皆橫逆君子則

受之已耳有何別樣道理

答梁慶龍

雲卿

所慎尚未完慮悶安心養氣火降氣和自然達乎四
體而痰疾自祛有時默坐澄心以試其功示喻志則
大矣徒言何益猛著力以做去

答金在鉉象鉉

辛丑十二月廿四日

在北向南有陽明之義故曰昭在南向北有陰幽之
義故曰穆蓋天子七廟諸侯五廟大夫三廟適士二
廟官士一廟庶人無廟今庶人家奉四代祭似是僭
然却無廟不可謂之僭且先儒以高祖有服不可無

杞之義止祭四代自宋已然故今成俗

答李在玉

子蘊

○辛丑三月十八日

書來帶以八味元及人之老是亦孝之推也非真心
愛好豈至是耶感無以報報以空言可乎受用者認
之以實則安知無少補耶子蘊終是立心不確確則
雖天神叫呼不爲移動必篤志於自修莫役心於外
勿涉險路勿妄想於分表惟親志是順惟友愛是篤
此孝之至也

答金容瀚

德辭

○甲辰八月日

盛課續無間斷否祗在我此心堅固得定心之所之

曰志志爲氣卽志立則氣自浩然而養之得則塞乎
天地間苦人無用力於此耳俗務瑣瑣不足置胷中
一面之期非不欣企而不近之地不必如是待秋後
一期病腕執筆難於扛鼎

答金達

景三〇甲辰八月

盛課不住研鑽心恆在茲雖口不咿唔胷襟自然洞
透義理昭著無是則茅塞矣汲汲如不及無失少壯
時節至禱

答李鍾洛

明彥〇癸卯元月十五日

雖共遊之歷年未曾有一毫相輔益心常愧愧今見

書求助之意溢於辭旨顧癯朽救其身之不暇尚何
望及人然每見賢志有眷眷不置志既如是則持之
同行之篤循之以上自有無限好消息勉之覲行泥
道寫違惟望利稅

答李甲壽

○甲申六月十七日

天地間最巨物放在眼前較看一粟之微渺然有須
臾之感貫洪纖而不遺洞窮宙而無極惟道爲然苟
窺一斑庶不自負無徒羨其巨大者而或忽於微細
也

答鄭惟本

魚鰕之鄉炎瘴最苦今則稍退而視事之暇有潛翫
之樂心爲形役淵明之所不免而亦在吾所守之如
何太平洋則天地間最巨物而猶有局定之限若吾
人曾海能小能大元無限量有悟於此通貫無形之
外豈不是真正大英雄乎平生所矢願而不能者願
與君輩交勗焉

答張求壽

己丑十一月二日

以早失居業蹉過少壯爲憂無憂此不當憂惟患志
不立陶菴之門有林小學保不解文字讎諺讀之漢
湖之門有李敬菴健二十無文受人勾讀而皆終成

志業著名當時今賢者苟志在爲學孜孜不已何古
之人不若

答金永善

○癸卯閏五月十一日

晦日○者成服于來月則大功以下皆以成服月除
恐宜 國恤中心制者白衣笠恐是

答禹濟弼

疇汝○甲辰四月少晦日

間苦美慎今稍痊勝云旣慮且喜在侍惟憂想無已
曾試藥食效累矣將攝調理無犯少愈之戒人於疾
病治心爲第一義諦靈臺淨廓氣血聽命不爲其所
動厥效自在因覺之中寢食之節亦所當念氣不調

疾之所由生也謹之勉之

答李汶祥

乃憲○甲辰十二月九日

盛課魯論了得幾編將弟子問處爲自己之問而恆
若夫子在座否此書於學者日用工夫最爲親切幸
須喫緊用力讀來讀去使厥效自在罔覺之中如何
迷孫與之同槩甚幸互有相長三餘無幾彌勉努力

答申鉉求

自如○甲辰十二月晦日

向書尚感而病中難於搢管稽謝至今可媿收放心
爲用工第一真詮而每患不能專用力於此無爲過
口之悔彌勉著心之工

居處先生文集 卷十

與金文燮

會輔○乙未正月七日

盛課無間斷安貧讀書是難事不百倍其力終不免俗下人是在各其用力之如何而工夫不專在讀書日用事爲罔非做工處以實心做去無或玩愒歲月以致後也之悔贊迫歲盡室出月村凡百去益憂憂不能忘情故居間日八山亭而昨暮八此爲見賢姑畱此此伴回同作行則甚好甚好雖有小拘期拔置來暫晤

答孫婿崔相鎬

序武○癸巳十二月念二日

示心無定處此何故也此等處可以見工夫矣心無

定則何不定之定之之方在敬以直內此文字無笑
其迂濶也最好此敬一字於世間萬事無不當矣試
以存養則凝神定氣更無此心走作之弊大肆力用
工工夫不專於讀書諒之也

答孫婿崔相鎬

丙申十二月二十二日

人之補元莫如正心心正則氣和氣和無有邪氣平
其間者正心之工莫如謹獨而以書課填補去勝於
百藥補身幸以此意常存諸心上無至空費神用也

答外孫申台植

乙酉二月十九日

每思到汝棘櫟之容此心折盡無寸矣天下至頑者

人心眞木石不如吾遭汝伯舅之憾而猶延今日之命今遭汝先人之逝而猶延今日之命矣然哀邁特甚神殞精亡似不久於世一朝溘然豈不大好悽活而但平生所業之不得行于時而略著之於書有若干焉素日託於汝爺汝爺先我去無復爲吾後事者是可恨也山地無或妄求名山土厚水渌藏風向陽即名山以是爲意也今見汝手滋可認工夫不淺勉之勉之必有不食之報矣近日偶得齒病吟呻中不能長言節哀加餐

答外孫申庭植

庚子

吉凶哀慶種種不能修問昧然若路人此何人事雖以汝至情善恕亦不無慨訝而所謂外家置之度外則心自安也吾軀命奇薄生世無世況且貪窮徹骨到老彌甚惟過死是俟而苦不速化耳

與申絃斗

應七

世間萬事隨遇隨應此外無他道理惱心焦患無益於事反害於理幸不撓廓然之志以待蒼蒼者處分

答龜巖齋諸生問目

甲辰六月

大學家齊於上教成於下者化耶推耶

仁以及物謂之化恕以及物謂之推自上而下家齊

臨齋先生文集卷之七
而教成則雖是化而終是推也

上既引孝悌慈三事而此只言慈一事何也

孝悌雖人所同有能守而不失者鮮矣惟慈之天罕有失者卽人所易曉者而只言慈一事以推廣之耳
絜矩當以絜之以矩看乎抑以絜而矩之看乎

朱子答周舜弼書云度之以矩而取其方今當以絜之以矩爲正義至若答江德功書云度物而得其方云者當屬初年說

臨齋先生文集卷之七

臨齋先生文集卷之八

書

上親堂
◇庚戌十月十六日

子去廿四日入京寒感路憊交劇入泮留七八日月
初往鷺湖受學一部大學恆侍函筵其所承誨多有
他人所不及者而資本魯矣恨不能佩服不失也歸
期斷以今念五間伏計而丈席以不拘齋糧歲內留
在之意爲教果川丈亦一般強挽然顧念畿內各道
之士聚集如雲日事擾擾直丈席恆在不寧酬接之
煩著述之苦僅僅堪耐緣此諸在門下之人工課實

難篤實且漢中寒候太異南土若日候驟寒實不能耐遣不得不速圖還鄉而抵家之期似在來七八日間

上周南族祖

元模○壬子正月七日

過年左顧得陪累日清誨兼蒙贈言縷縷獎引非愚駭所堪承當而警誦之際感勵之意邂逅觸發無乃至言成章遐想淵趣有以動得它精神耶謹當龜藏璧翫用作畢生節度近得晚洲權公遺集閱所與門下書及門下所疑問數條不覺歛衽三復作而歎曰非平素自期之大異於人豈得於師友間者有如是

於是焉益信嚮仰竊欲鼓篋一造薰接頰光而迄不
得遂自負悚恨伏惟履茲正元經體起居茂納百福
贊奎客秋作鷺湖行數朝留連非無觀感之得而五
辛腸肚百丈蹊茅未曾十分剗却歸復循常羣邪交
攻一念間斷便壞一日之功一日悠泛便亾一月之
功如是而終做得甚事也退翁所謂新嗜靡甘熟處
難忘其亦爲是道耶

答蓮渠族兄

秉坤○癸亥流月二十日

愛身惜命亦所以爲先也區區外至之榮有何加損
於祖先乎闡揚亦自有時矣此時果何時隨衆送行

坐在迷局贊奎何以辭其責追莫及焉然舞旣張矣
一娑娑曷可已也恨不袖長長也心菴相公之不爲
擔着此事亦無恠其或然超贈自不易事 逕葵豈
無難舉乎使人人之心安能盡似其子孫之苦心渴
望也惟所恃者吾至誠庶幾動得他方寸事難遙度
濶量進退

答族兄

在憲○辛酉二月十日

客歲歲不盡一日辱書兼示寒泉序時則一年究竟
際也流光之歎無聞之恨自不禁繞繆于懷况發之
書而若相會者乎春來多事搦管苦無其隙稽謝之

誅已簿置案右矣一初勵葉鼓作心志可能與春氣
同其奮發否叙文辭意俱到其爲伯錫勉者摯矣奚
但伯錫也於我乎亦爲他山之攻受賜多矣伯錫已
勝冠而日月就將否泉記頗好又期勉者甚大實瞿
惡疇昔寒泉勒石日宜有一篇記識而未果但近有
所謂歸隱洞記茲謄送

答族叔聖極

斗欽○壬子十二月七日

賢咸將冠其首矣同慶之誼何待盛速而但師服在
心靡敢自同恒人恐難副教諒恕冠者成人之道也
人生一初責成之地而難再之禮也今世未有講此

道行此禮則其卒無成人之實固爾座下必不以無成望於後昆勉諦斯義加以三儀使之棄其幼志受天之慶於節目之間有所不講瞻聆之地有所不慣則自不免有苟焉以循俗勿之乃爾也冠用緇冠爵弁安弁而爵弁難辨代以笠子幘頭

答族弟天若

字坤○乙未十二月廿二日

杜門溪居作斷橋和尚令抱妾顧有書投出欣審間者邁軸已搬體節衛重大慰攸芋窈靜幽僻真隱淪之可居而座右之爰得我所溪喜也安得偕半攜手同歸最心所傾往者先楸之下而綿力無由遽議甚

恨目今交象如此吾頭更無可禿之髮顧念兒孫役
將何以爲之文筆之祖孫敵手亦不易事愚亦效嘖
試翫

與族叔彝善

奎欽○庚寅七月七日

阻懷以歲計在少壯時未或然矣而及此垂死是可
爲耶龜巖齋役已竣自宗中爲一會期期在明初八
各處老負想齊會此勝事也茲書告明早貴然

答族弟福汝

泳坤○丁丑二月二日

北壁香種採寄已極欣倒而滿幅示諭喚傲問學上
要設使之扶植根基培養元氣卽此而見高明所造

之實昔郭橐駝善種樹人問養樹而得養人之術欲傳其事以爲官理今亦以子之說移之於學爲用功之符可乎因此而有所質者香巖之香林歷幾千年矣而種下種生於剷壁層崖之間如華山桃花生乎石縫不由核種此何物性是不可以常理限者願示破迷見焉

答族進士

斗煥○丁卯

追造神主之節退溪之謂當行於正廳者以祠堂火而改題於前日安神之所也南溪之謂當行於墓前者以初未立主既無安神之所則行於墓前猶有所

憑依也然骨肉歸于土魂氣無不之故古人以鑿井
得泉爲比朱子且云祖宗氣只存在子孫身上蓋子
孫在此神亦在此矣雖未立主猶有紙榜行祭則是
亦安神之所只當因家祭題主不必求諸原野

答族侄德一

鎮睦○癸丑十一月十四日

萬山冰雪一榻幽絕而所謂伊人宛在心曲爲誦成
大谷詩已知路絕無人到猶倩山雲鎖洞門之句以
暢窈糾之懷已矣盛課了得幾書而能孜孜不已用
當抵年之夜族從所苦澤得一層意緒減却十分長
時頗仆睡魔相謀而書役苦無了期曠省從以熏心

奈何每晨鐘而起盥櫛而坐誦伯夷傳一遍呼茶傾
一盃漢翁所謂靜息今世誰有此襟維以爲樂以暢
我心者不知此可爲此間奇況耶

與族弟百順孝源○壬辰七月七日

追提既往無益於補愆只欲自訟不敏早宜一書亦
莫之自遂固非衰廢者於人事上都沒耳所冀幸人
各付人恕其來新在盛度無損焉與吾從相見許久
求之色相皆失之家學淵源之漸庭謨詩禮之述擔
在一身其爲任彌重且遠克闡發揮益大以光胤從
早齡造就如彼其卓然吾宗不寂寞贊自存憾來無

復人世況長孫纔已冠佇見其成立而憂欲久視於
世妄耳欲耳

與族弟萬奎

台應○癸卯正月二十六日

高明之移軸伏賢巖雖少遂寤寐之願既未全家之
隱則恐難永矢不告早晚還于舊居爲收拾一門之
計見今村樣凋弊莫甚後進教育之方任無其所此
非細故此箇意思無人識得良悶族從喉喘僅保恐
難久於世思與高明商確多小而不得恨恨

答族弟光瑞

泰坤○乙未正月十三日

前書托子之勤意雖無是其相愛相勉豈歇后哉而

顧無及人之力何哉然與人同善之心則有不能自
已况胤從之之人之器大受無量乎幸彌加督率無
少放過族從年病俱就觀居此世果何樂

與族侄鎮甫

周甫○戊戌四月十五日

伊上碑役今已磨治云而未知其果善否也此事將
垂諸百世豈可草草乎如或有不如意之端豈爲而
復爲乎固欲躬進一睹而眼疾適發未遂日間將擬
往碣文非敢更成明將專書於道卿族使之覓本草
於箱篋中而其見存未可知如其不得則不獲已只
叙世系子孫錄幾何以刻此外無他道也

與族侄公甫

錫輔。癸巳十月二十九日

宗君喪喪在客地慘惻不可暫緩者返柩也立後也宗舍也俱屬茫然今座右獨念及於此勤示如此甚甚幸幸

答族叔丙彥

致彥。癸卯十月二十四日

示喻縷縷有以見工夫之益臻高明一此做去無遠之不可屈欽羨欽羨人子歌一篇讀之懽然有感發處有數文字非是之謂歟齋中兒少之朝夕歌咏甚好豈止一村雖人人與之亦自美事流俗之嘲有何足恤首句句語長短恐違節更加改整

與族從士弘

在吉。丙申八月十八日

新寓冷落莫無踽涼之歎聞方續絃不得不爾胤王
不以哀疚廢課否古人於居憂不廢講學俾勿緣哀
停課其資品雅潔將來成就似不草草善身教之是
望焉

答族弟翰基

伯詹。庚子九月

禮數易知禮義難知示諭服制於圖式詳之但不言
其義耳蓋服制斟自氣血之屬而推之以義出系子
既為人後第當為其家家廟所主則為父祖皆降者
避二統之嫌也出嫁女適人從夫而其家廟所主在

夫不在已則爲父母降者避二統之嫌也而祖曾高
不降者無二統之嫌也兄弟伯叔父及從祖之妻酌
以氣屬而制爲義服也母昆季之妻古無服自開元
禮酌以血屬而制爲義服也妻父母情義之服也師
友道義之服也

釋奠釋字永釋不掇之義也凡祭俱有掇文而獨聖
奠無掇文者以垂無已之意歟釋菜奠果主以菜果
蓋上古民皆生食而生食始於菜也果及其久也民
知血食而血食始於鹿兔又久也民知火食而火食
始於黍稷蓋不忘本之意

答族侄仲蘊錫華○庚子九月廿日

近日所遭不欲索言世間萬事歸宿平常底道理恒少世漸下而不古者此也祇當順受已矣人於應事處順境易處逆境難難處處易可見得力處勿以有所之病累我靈臺

答族叔周烈

孟表○辛卯六月二十日

向來飲禮之席竟失一晤至今爲悵儒風寢邈此禮之行漸不其多若有行之者雖路遠固當身往以睹其儀可也今不能然者未知有何所樂若真知儒行之可貴斯道之可重必不如是歇右也族叔年少豈

知此也但恨老悖於平日無以相導率於禮法之場也丹陰蔡丈及鎮禹族侄典坪全友皆無寄來詩幸卽說及

與族孫範洙應天○癸巳四月十日

禮說書役尚未就緒尚無寫手又無助以校攷者爲悶日間貴然以爲幾日苦狀

答族侄晶鎬武卿論語問目

弟子指門弟子而言歟行此六事而後有何暇日可以學文耶

弟子指爲弟爲子而小註南軒雲峰說皆然矣陶菴

講說爲師弟子者未敢知餘力學文云者非謂盡行此六事畢後只當以六事爲本而隨暇力學文也蓋六事無時不行文亦無日不學如輪翼相須

無友不如己云云

必擇勝已者其人已非不如人者此等人人何不友我以是取人人以是取我擇友之義自行於其間而庶無不如己之友矣今之取友則不然勝已者厭之不如己者好之夫子之戒所以發歟

十有五而志學止不踰矩云云

聖人生知安行固無積累之漸而猶自言其進德之

序如此者所以勉進後學也然皆問以十年以進至不感知命耳順不踰矩者非聖人不能只以孔氏遺書爲學次第循序以進則及其成功可到聖人地位歟

孝友是亦爲政則是乃一家之政行乎一家而後可行於一國乎

孝友是一家之政而推廣其心亦爲一國之政示意亦得大抵爲聖賢之學者先須知自守之道惟爲吾所當爲無慕乎其外是爲自重自重則道尊故曰志雖有須而恬然若將終身乃能用常蹊不進而志動

者不能用常也今之爲士者此義尤不可不知也

與族人國賓

載典○丁亥

此試有日想不以一例奔忙者與之短長若豫有一分期待之念則十年讀書反不爲吾自修之方而曾中已不覺更添一事豈不可懼之甚耶

答族侄錫淳

璣五○癸卯十一月

前者惠書癸淹未復想恕諒盛課不其放過耶蓋讀書所以明理明理所以實行也無徒以呬唔爲學而多體驗事爲上也治家務農事親敬長無非學也然每見年少輩因父兄教導有些少向學之心仍優遊

自過終於無聞而止可歎賢勿歸此科也

答族從貞欽

吳景。甲辰十一月廿二日

妻喪杖用何杖乎近俗皆廢之從俗可乎

妻喪用具三年之體故有練祥禫而杖矣何必從俗乎杖則用木不厚大

妻喪未除而遭祖父喪則平居之際當服何服從重可乎

妻與祖父有杖不杖之別則平居常持之服從可知耳

妻父母喪襄禮及小大祥云云

臣等奉 聖訓
妻父母喪服除而襄禮臨壙巾帶恐無妨小大祥吊服素帶從厚之義亦無妨歟

玄孫以童蒙承重高祖而未終祥禫則次玄孫繼而承重可乎

玄孫以童蒙未終祥禫則次玄孫承重可也

出母歿而父不許奔喪則如之何

出母歿而父不許奔則祇當擬之於心而為喪子無絕母之義故也

與族人碩基宅汝

所慎何如是支離生涼當復常所望惟在君學問之

向上不已而每恨吾導之之未盡耳

答相元寬榮敬榮諸宗

癸卯四月十二日

辭旨之間有以見工程篤實尤所欽仰然心無貳用
着於此則疎於彼亦勢也實地上踐履得而發於辭
則自達以是爲度無徒馳於文辭之間近來儒門之
弊恐有是慮故畧及之

與譜所僉中

○乙亥十一月十五日

人家世系之不能保有於累劫之餘者舉世同然夫
孰非三韓世族而能嫡嫡相傳繼繼不絕者有幾家
耶然以國中巨族僅系數十世之近未有如吾家者

也根渙則枝達源遠則流長其理果何所徵乎吾家
自上世有櫓南鶴巖龜溪祖子孫三世之赫赫簪纓
逮至中葉樂齋東臯全歸堂龍溪之鳴世道學未嘗
有一世中替則先系之疎漏墓所之失傳皆不可知
者也吾輩後生恪守舊譜以俟後日此外無他道理
然今於修譜之日斷爛片籍種種出於蠹笥之間菴
起子孫之疑如晉州冬勿谷墓誌也利川徐氏譜系
也版圖公大同江詩也金仙源版圖公墓詩也版圖是麗
朝官職名則其人之青松沈氏譜中女婿有諱晉字不止一二從可知矣
諸條之疑案不一其端而今見示中文字則尤疑案

之甚者也何者此以冬勿谷誌中世系上承京派下
承鄉派以爲京鄉合系之證而配位或相左中副承
公配之爲翁主者尤爲不然者也未知此文字始出
於何處而其昭然明證乎如其未也則豈可遽印譜
編昭示後人乎若或一毫爽實其爲萬萬未安不但
以率爾言疑以傳疑以俟後日可也

答山隔宗中

丁亥三月十五日

今番設講 朝飭不翅印復而一鄉各門濟濟可觀
獨吾門見選不幾人吾門後進果若是不彬彬乎甚
爲寒心是皆父兄之責從今門中後生之才藝可教

者不待其父兄之勤而先自門父老督勸獎進以開後日之運

答山隔宗中

立宗事宗議既如是爛漫將為成文則與受家有主
定處始可宗會而宗家姑婦各居諸宗將會於何地
而自相成文耶事面固不當如是況其家尊在老
姑而姑尚不知此事之何如一言不相及自宗會中
自為成文此何事體事之沒無頭緒如此而無人議
處康洙族孫以門丈之意來議故曰字與宗會一從
僉議而自會中通奇道州議處也

與從姪錫龍雲瑞

君勤儉之德處家之道自有餘矣明農課子以爲一身之間幅慎勿作鄉曲間出入也非吾身之自高也空然是非從無事出入中來也況吾豈可百全而無可否之端乎社門守拙是吾家本規也

寄兒鎮國庚午三月七日

居山來客况佳穩讀課課日耶工夫必有節度日課無廢間以吟哦叙暢也如其難緝雖約以十餘行無闕可也服藥亦然矣金瑤永俱穩過耶閉門讀書無爲僧所苦也

寄兒鎮國

已卯十一月

書來知近日連得安過可幸吾狀依前而雲兒亦穩過耳山寺讀書此少年時佳趣古來名流舉多有此然近來則山俗不如古僧輩最憎之此亦佛教漸衰無修行高禪故也不必冒人所厭而長爲畱連從速圖還寺中如或有不如意者不必介意只好面善待而來也物各付物則天下無險巖境界處李葉義諦固當如是也金容鎬勤課愆未書以此語申之也

寄兒鎮穆

丙子正月十三日

未知近日來汝寢食無事氣已悵健否家間連無事

不啻孫亦克實耶不任他出外放遊而種種索覓也
汝亦不出門一步地而惟讀書送日也或書字外切
勿以他事着心也家間凡百汝須善爲措處男子年
十七世間事有何不做去者乎志氣高脫自然氣像
凝重凡對人接物之際曲盡道理可也畱念畱念

寄兒鎮穆

戊寅五月二十日

自送汝行今幾一朔聲息漠然我心怵怵有不曰復
不過時乎又不曰不惟己之思親不置恐親之念我
不怠乎此皆汝所讀熟著也今何緩晚至於此甚其
或身家不健否慮無所不到也卽欲自此專伴而今

則國服未成勢將稍俟幾日及其潦暑未至卽歸
來也若在路遇潦雖畱店幾日無或犯危也

寄兒鎮穆

丁亥六月十五日

客苦多日可能堪耐耶八山爲其靜攝無慮無慮棲
心於恬淡之境節食服藥置身於閒定之地則宵寐
自寧神精自貞矣

寄兒鎮漢

庚子八月

爲幾日而抵得能無憊耐過耶聞食飲多不堪之苦
云是則役心於口腹而然也若有咬菜之志何不堪
之有耶家中無事而向來勉菴崔台丈臨訪畱一日

行鄉飲行講會會者六十餘人汝獨不參於此等盛會甚可恨行資明知其不足而無以辨送良歎

寄兒鎮馨

辛丑六月十四日

向見汝所居甚博之具俱在其側非曰汝所戲而雖他人爲之見之可憎日用事爲雖百年做去猶患力不逮而常聞俗人不計老少每云消日無資此等果何狀人汝亦作此科白中人則豈不可哀乎此生不再來銘心也

侄之祭叔母固也若無有則不得不女爲單獻無祝可壻則不必爲亞終獻故爲單獻耳

臣等奉
卷八

寄孫兒甲洙健洙

戊子

讀書不勤意趣不長無闕日課行數小而讀數多可也日讀百尊負吾言非吾孫也

寄孫兒甲洙

甲午五月

日來寢食一依耶今日既欲入家故二僮一驢送去轎則解負一僮只以短驢及僮蕭然馳到也有一毫俗所謂到門意則切不可也細樂雙笛欲之則非不易也他日可也今日未也諒知否汝有未足意則不可耳得榜既慢意又欲盡其悵樂耶花未開月未滿有無限餘意汝七甫若任座試回首見之老侍下失

意而來慰其心亦可也內實好矣外華不足道也

答孫兒甲洙

戊戌三月廿七日

看書不可泛忽先究其一章大旨且細審訓詁了然
心目間而熟且誦如已言始可爛用其名理亦何必
終日埋頭反汨沒神用有時游詠可也至若門外事
元不相關於我耳閉口緘亦不置諸心目也

答孫兒健洙

庚子六月十四日

乳穉克健有物入手則僂入口此甚爲慮種種生病
在此飭兒母數數察之也汝則旣無所事矣日三竿
而起眠擇清涼而晝眠則其爲人之無用可知人於

臣履泰之書
卷八
苦勞餓之中玉成猛省奮發眼常掛書手不去筆有
時默坐澄心深思處世經綸然後庶可扶持門戶若
愚昧無用悠泛度日畢竟當作何狀人耶何待余言
滾諒篤實也如是則身亦健而無病矣

寄孫兒健洙

癸卯十二月

山寺讀書非不可樂而亦有無限苦狀喫得苦始可
做百事勿以安於自便反生惰怠恒若嚴師在座也
忍飢耐寒少年時種種當之而忍耐過則易於生病
反以貽憂亦所爲念耳

臨齋先生文集卷之八

